

# Éditorial

## Eng eenheetlech Ausbildung fir d'Enseignanten !

### D'initial Schoulmeeschteschausbildung muss op Masterniveau gehuewe ginn !

De September 2023 leeft déi éischt Quereinsteigermesure, déi viru 5 Joer agefouert gouf, aus. Well awer nach ëmmer massive Bedarf u Léierpersonal an eise Schoulen herrscht an d'Aschreiwunge fir e Bachelorstudium an den Erziehungswissenschaften op der Universitéit Lëtzebuerg net duergi fir d'Besoinen ze decken, wëllt den Educatiounsministère eng 2. Oplag vun enger ofgeännerter Quereinsteigermesure aféieren. De « Quereinstieg » soll dës Kéier net méi direkt an de Beruff féieren, mee d'Detenteure vun engem Bachelordiplom, deen am Zesammenhang mat der Schoul steet (Psychologie, Sproochen, Mathematik, Sozialwëssenschaften, Pädagogik, etc.), sollen ab nächstem Schouljoer d'Méiglechkeet kréien, en eejärege Studium vu 60 ECTS-Punkten an der Pädagogik an an der Didaktik op der Uni.lu ze absolvéieren. Dëse Studiegang soll mat engem « Bachelor en Formation pédagogique » ofschléissen. Deen Diplom géif den Absolventen dann Zougang zum Schoulmeeschteschconcours ginn. Dee Moment wäere si de Studenten, déi e Bachelorstudiegang an Erziehungswissenschaften vun 240 ECTS-Punkten op der Uni Lëtzebuerg mat Erfolleg ofgeschloss hunn, gläichgestallt.

Et sollen also an Zukunft zwee verschidde Weeër méiglech sinn, fir Enseignant am « Enseignement fondamental » oder an der « Voie de Préparation » vum ESG ze ginn:

- e Studiegang vun 240 ECTS-Punkten (am Prinzip 4 Joer) an den Erziehungswissenschaften op der Uni Lëtzebuerg
- e Bachelorstudium an engem Fach a Relatioun mat der Schoul (normalerweis 180 ECTS-Punkten) an duerno e Pädagogikstudium vu 60 ECTS-Punkten op der Uni Lëtzebuerg (am Prinzip 3 + 1 Joer).

#### Mee vergläiche mir elo emol déi zwee Weeër mateneen :

Firwat soll e Jonke sech vun Ufank un an e Studiegang an Erziehungswissenschaften aschreiwene, wann hien och no engem Bachelor an engem Fach, dat a Relatioun mat der Schoul steet an no engem « Crashstudium » an den Erziehungswissenschaften, de Schoulmeeschteschberuff ergräife kann?

Den SNE/CGFP gétt ze bedenken, dass den Diplom vum Bachelor an Erziehungswissenschaften eng Einbanstrooss ass, déi just zum Schoulmeeschteschberuff féiert. Am Géigesaz dozou léisst engem deen anere Wee eng vill méi grouss Palett u Méiglechkeeten. De Minister Meisch selwer hieft dës Virdeel ervir andeems e seet, dass déi jonk Leit mat 18 Joer dacks nach net wëssen, wat si genau studéieren wëllen an dass den zweete Wee hinnen herno vill Optioune gétt.



Den SNE/CGFP fäert op alle Fall, dass sech vill manner Kandidaten vun Ufank un an de reguläre Studiegang an den Erziehungswissenschaften aschreiwene, well hinnen deen neie Wee vill méi Méiglechkeete fir déi spéider beruflech Karriär léisst.

#### An dat kann et net sinn !

Well den zweete Wee also fir de jonke Mënsch eng Rei Virdeeler géintwärt dem reguläre Studium an den Erziehungswissenschaften huet, ass déi Proposition vum MENJE fir den SNE/CGFP net akzeptabel.

Den SNE/CGFP fuerdert eng eenheetlech Ausbildung fir d'Enseignanten aus dem « Enseignement fondamental » an der « Voie de préparation » aus dem ESG.

Mee wéi soll deen eenheetleche Wee dann ausgesinn?

Den SNE/CGFP plädéiert fir een « 3 plus 2-Studium ».

Fir d'éischt sollen d'Studenten e Bachelor vun 180 ECTS-Punkten (Reegelstudienzäit 3 Joer) an duerno e

Master vun 120 ECTS-Punkten (Reegelstudienzäit 2 Joer) maachen.

Op dësem eenheetleche Wee sollen et an eisen Aen awer zwou verschidden Optioune ginn, ouni dass een dofir bei enger vun deenen zwou Optioune benodelegt gétt:

**Méiglechkeet 1 : E Bachelor an engem Fach a Relatioun mat der Schoul an duerno e Masterstudium an de « Sciences de l'Éducation »**

**Méiglechkeet 2 : E Bachelor an de « Sciences de l'Éducation » an duerno eng Spezialisatioun als Masterstudium**

An den Ae vum SNE/CGFP féiert definitiv kee Wee laanscht e Masterstudium fir d'Enseignanten aus dem « Enseignement fondamental » an der « Voie de préparation » vum ESG, och well d'Defien an d'Uspréich un de Beruff an de leschte Joren zougeholl hunn an och an den nächste Joren net ofhuele wäerten.



Firwat zéckt den Educationminister esou vill? Wär elo net de Moment fir Neel mat Käpp ze maachen? Eng eenheetlech Ausbildung fir all d'Léierinnen a Schoulmeeschteren op Masterniveau wär eng nohalteg Léisung, déi d'Schoul an den haitegen Zäiten no vir géif bréngen.

Léif Kolleginnen a Kollegen,  
Ech wënschen Iech am Numm vum SNE/CGFP an och a mengem perséinlechen Numm, op dëser Plaz, schéi Feierdeeg, eng gutt Gesondheet an e schéint an erfëlltent Joer 2023.

Och 2023 wäerte mir ons op ons Haaptaufgab besënnen, ons Memberen ze representéieren an hir Rechter an Interessen ze verdeedegen.

Mat syndikalistesche Gréiss  
Patrick Remakel  
President vum SNE/CGFP



Patrick Remakel,  
President SNE/CGFP